

第十册

法淮新  
南子語  
言

諸子集成

河北人民出版社

新淮南子語

諸子集成 第十冊

河北人民出版社

陸 賈 撰

新 語

河北人民出版社

一九八六年四月

# 新刊新語序

漢班固論列劉向父子所校書爲藝文志。又郎歆所奏七略中序六藝爲九種。首之以儒家者流。稱其出於司徒之官。游文於六經之中。留意於仁義之際。宗師仲尼。以重其言。雖未必盡然。要亦有近似者矣。書凡五十三家。而陸賈新語十二篇。實存焉。予讀其書。信固之知言。又嘆司馬遷之雄於文也。遷傳賈拜大中大夫時。時前說稱詩書。高帝罵之曰。乃公居馬上得之。安事詩書。賈曰。馬上得之。寧可以馬上治乎。湯武逆取而以順守之。文武並用。長久之術也。昔者吳王夫差智伯極武而亡。秦任刑法不變。卒滅趙氏。鄉使秦以并天下。行仁義法先聖。陛下安得而有之。帝有慙色。謂賈曰。試爲我著秦所以失天下。吾所以得之者。及古成敗之國。賈凡著十一篇。今其書不下數千言。而其要旨不越遷數言。於是乎知遷之雄於文。序事覈而明可指也。然遷尚豪俠。喜縱橫。而稱其固辨士。固稍知重儒術。既列其書於儒。又贊其身名俱榮。爲優於酈婁建通輩。賈亦有以自致之哉。故知人不可以無所見。有所見。必不能掩矣。先儒議其逆取順守之說。及秦雖行仁義。不可及者。秦漢辨士。豈足及此。要之亦爲高帝既定天下而言之耳。其書亦不復見此論。豈遷以己見文飾其說而致然歟。若其兩狗之輩所不及。而一時射利賈友探芝錦裏之徒。亦豈可企哉。其書所論。

亦正且多崇儉尙靜等語似亦有啓文景蕭曹之治者但無段落條理。如先儒所論賈誼之失自是當時急於論事動人主聽不暇精擇渾融觀遷謂其每奏一篇帝輒稱善其稱新語又出於他人可見其隨時論奏非若後世之著述次第成一家言也其所分篇目則固所稱向輒條其篇目撮其旨意奏之者必非其所自定然其言既與遷傳合而篇次至于今不訛且雄偉粗壯漢中葉以來所不及其爲真本無疑秦漢之書傳至于今無訛妄如此者良亦鮮哉方今承平既久文章熾興有識者或病其過於細而弱也故往往搜秦漢之佚書而梓之然辨鑒未精以僞爲真則害道壞教亦有之矣予竊病焉適過桐鄉訪宗合族而得其令蒲陽李君梓是書見眎予素聞李君學博意誠履樸守謙而敏於政事今觀是益可見其見之明而擇之精也樂書諸其首君名廷梧字仲陽以己未進士來已二年此又仕優而學之一端云。

皇明弘治壬戌歲日長至翰林國史脩撰儒林郎華亭錢福序。

# 新語目次

道基第一	一
術事第二	一
輔政第三	一
無爲第四	四
辨惑第五	一
慎微第六	一
資質第七	一
至德第八	一
懷慮第九	一
本行第十	一
明誠第十一	一
思務第十二	一
	一
一九	一
一八	一
一六	一
一五	一
一三	一
一〇	一
七	一
六	一
五	一
四	一

# 新語

## 道基第一

漢中大夫陸賈撰

賈撰

傳曰。天生萬物。以地養之。聖人成之。功德參合。而道術生焉。故曰張日月。列星辰。序四時。調陰陽。布氣治性。次置五行。春生夏長。秋收冬藏。陽生雷電。陰成雪霜。養育群生。一茂一亡。潤之以風雨。曬之以日光。溫之以節氣。降之以頑霜。位之以衆星。制之以斗衡。苞之以六合。羅之以紀綱。改之以災變。告之以禎祥。動之以生殺。悟之以文章。故在天者可見。在地者可量。在物者可紀。在人者可相。故地封五嶽。畫四獉。規洛澤。通水泉。樹物養類。苞殖萬根。暴形養精。以立群生。不違天時。不奪物性。不藏其情。不匿其詐。故知天者仰觀天文。知地者俯察地理。跂行喘息。蜎飛蠕動之類。水生陸行。根著葉長之屬。爲寧其心而安其性。蓋天地相承。氣感相應。而成者也。於是先聖乃仰觀天文。俯察地理。圖畫乾坤。以定人道。民始開悟。知有父子之親。君臣之義。夫婦之道。長幼之序。於是百官立。王道乃生。民人食肉飲血衣皮毛。至於神農。以爲行蟲走獸。難以養民。乃求可食之物。嘗百草之實。察酸苦之味。教民食五穀。天下人民野居穴處。未有室屋。則與禽獸同域。於是黃帝乃伐木構材。築作宮室。上棟下宇。以避風雨。民知室居食穀。而未知功力。於是后稷乃列封疆。畫界。以分土地之所宜。開土殖穀。

以用養民。種桑麻。致絲枲。以蔽形體。當斯之時。四瀆未通。洪水爲害。禹乃決江疏河。通之四瀆。致之於海。大小相引。高下相受。百川順流。各歸其所。然後人民得去高險。處平土。川谷交錯。風化未通。九州絕隔。未有舟車之用。以濟深致遠。於是奚仲乃橈曲爲輪。因直爲轅。駕馬服牛。浮舟杖機。以代人力。鑄金鏤木。分苞燒殖。以備器械。於是民知輕重。好利惡難。避勞就逸。於是臯陶乃立獄制罪。懸賞設罰。異是非。明好惡。檢奸邪。消佚亂。民知畏法而無禮義。於是中聖乃設辟雍庠序之教。以正上下之儀。明父子之禮。君臣之義。使強不凌弱。衆不暴寡。弃貪鄙之心。與清潔之行。禮義獨行。綱紀不立。後世衰廢。於是後聖乃定五經。明大藝。承天統地。窮事缺一字微原情。立本以緒人倫。宗諸天地。缺一字脩篇章。垂諸來世。被諸鳥獸。以匡衰亂。天人合策。原道悉備。智者達其心。百工窮其巧。乃調之以管絃絲竹之音。設鐘鼓歌舞之樂。以節奢侈。正風俗。通文雅。後世淫邪。增之以鄭衛之音。民弃本趨末。伎巧橫出。用意各殊。則加雕文刻鏤。傳致膠漆。丹青玄黃。琦瑋之色。以窮耳目之好。極工匠之巧。夫驢騾駘驥。犀象璫瑁。琥珀珊瑚。翠羽珠玉。山生水藏。擇地而居。潔清明。朗潤澤。而濡磨而不磷涅。而不淄微。附遠寧近。懷來萬邦。故聖人懷仁仗義。分明纖微。忖度天地。危而不傾。佚而不亂者。仁義之所治也。行之於親近而疎遠。悅脩之於閨門之內。而

名譽馳於外。故仁無隱而不著。無幽而不彰者。虞舜蒸蒸於父母。光耀於  
天地。伯夷叔齊餓於首陽。功美垂於萬代。太公自布衣昇三公之位。累世  
享千乘之爵。知伯仗威任力。兼三晉而亡。是以君子握道而治。缺二字德而  
行。席仁而坐。杖義而彊。虛無寂寞。通動無量。故制事因短而動益長。以圓  
制規。以矩立方。聖人王世。賢者建功。湯舉伊尹。周任呂望。行合天地。德配  
陰陽。承天誅惡。冠暴除殃。將氣養物。明<sub>缺一字</sub>設光。耳聽入極。目觀四方。忠  
進讒退。直立邪亡。道行姦止。不得兩張。缺一字本理杜漸消萌。夫謀事不並  
仁義者後必敗。殖不固本而立高基者後必崩。故聖人防亂以經藝。工正  
曲以準繩。德盛者威廣。力盛者驕衆。齊桓公尚德以霸。秦二世尚刑而亡。  
故虐行則怨積。德布則功興。百姓以德附。骨肉以仁親。夫婦以義合。朋友  
以義信。君臣以義序。百官以義承。曾閔以仁成大孝。伯姬以義建至貞。守  
國者以仁堅固。佐君者以義不傾。君以仁治。臣以義平。鄉黨以仁恂恂。朝  
廷以義便便。美女以貞顯其行。烈士以義彰其名。陽氣以仁生。陰節以義  
降。鹿鳴以仁求其群。鸞睢以義鳴其雄。春秋以仁義貶絕。詩以仁義存亡。  
乾坤以仁和合八卦。以義相承。書以仁敍九族君臣。以義制忠禮。以仁盡  
節樂。以禮升降。仁者道之紀。義者聖之學。學之者明。失之者昏。背之者亡。  
陳力就列。以義建功。師旅行陣。德仁爲固。仗義而彊。調氣養性。仁者壽長。  
美才次德。義者行方。君子以義相褒。小人以利相欺。愚者以力相亂。賢者  
以義相治。穀梁傳曰。仁者以治親。義者以利尊。萬世不亂。仁義之所治也。

術事第二

善言古者。合之於今。能術遠者。考之於近。故說事者上陳五帝之功。而思之于身。下列桀紂之敗。而戒之于己。則德可以配日月。行可以合神靈。登高及遠。達幽洞冥。聽之無聲。視之無形。世人莫覩其兆。莫知其情。校脩五經之本末。道德之真偽。既缺一字。其意而不見其人。世俗以爲自古而傳之者爲重。以今之作者爲輕。淡於所見。甘於所聞。惑於外貌。失於中情。聖人貴寬而世人賤衆。五穀養性而棄之於地。珠玉無用而寶之於身。故舜弃黃金於荆嵒之山。禹捐珠玉於五湖之淵。將以杜淫邪之欲。絕琦瑋之情。道近不必出於久遠。取其至要而有成。春秋上不及五帝。下不至三王。述齊桓晉文之小善。魯之十二公。至今之爲政。足以知成敗之効。何必於三王。故古人之所行者。亦與今世同。立事者不離道德。調絃者不失宮商。天道調四時。人道治五常。周公與堯舜合符瑞。二世與桀紂同禍殃。文王生於東夷。大禹出於西羌。世殊而地絕。法合而度同。故聖賢與道合。愚者與禍同。懷德者應以福。挾惡者報以凶。德薄者位危。去道者身亡。萬世不易法。古今同紀綱。故良馬非獨駿驥。利劍非唯干將。美女非獨西施。忠臣非獨呂望。今有馬而無王良之御。有劍而無班彊之功。有女而無芳澤之飾。有士而不遭文王。道術蓄積而不舒。美玉韞匱而深藏。故懷道者須世。抱機者待工。道爲智者識。馬爲御者良。賢爲聖者用。辯爲智者通。書爲曉者。

傳事爲見者明。故制事者因其則。服藥者因其良。書不必起仲尼之門。藥不必出扁鵲之方。合之者善。可以爲法。因世而權行。故性藏於人。則氣達於天。纖微浩大。下學上達。事以類相從。聲以音相應。道唱而德和。仁立而義興。王者行之於朝。疋夫行之於田。治未者調其本。端影者正其形。養其根者。則枝葉茂。志氣調者。卽道冲。故求遠者不可失於近。治影者不可忘其容。上明而下清。君聖而臣忠。或圖遠而失近。或道塞而路窮。季孫貪顙。失之地。而變起於蕭牆之内。夫進取者不可不顧難。謀事者不可不盡忠。故形立則德散。僕用則忠亡。詩云。式訛爾心。以蓄萬邦。言一心化天下而缺二字國治。此之謂也。

### 輔政第三

夫居高者。自處不可以不安。履危者。任杖不可以不固。自處不安則墜。任杖不固則仆。是以聖人居高處上。則以仁義爲巢。乘危履傾。則以貴聖爲安。動而益固。然處高之安。乘克讓之敬。德配天地。光被四表。功垂於無窮。益名傳於不朽。蓋自處得其巢。任杖得其材也。堯以仁義爲巢。舜以禹稷契爲杖。故高而益安。以趙高李斯爲杖。故有傾仆跌傷之禍。何哉。所任非也。故杖聖者。帝杖賢者。王杖仁者。霸杖義者。強杖讒者滅。杖賊者亡。故懷剛者久而缺。持柔者久而長。躁疾者爲厥速。遲重者爲常存。尙勇者爲晦近。溫厚者行

寬舒懷促急者必有所虧柔懦者制剛強小慧者不可以禦大小辯者不可以說衆商賈巧爲販賣之利而屈爲貞良邪臣好爲詐僞自媚飾非而不能爲公方藏其端巧逃其事功故智者之所短不如愚者之所長文公種米會子駕羊相士不熟信邪失方察察者有所不見恢恢者何所不容朴直質者近忠便巧者近亡君子遠熒熒之色放錚錚之聲絕恬美之味疎曠曠之情天道以大制小以重顯輕以小治大亂度于貞讓夫似賢美言似信聽之者惑觀之者冥故蘇秦尊於諸侯商鞅顯於西秦世無賢智之君孰能別其形故堯放驩兜仲尼誅少正卯甘言之所嘉缺一字不爲之傾惟堯知其實仲尼見其情故于聖王者誅遇賢君者刑遭凡王者貴觸亂世者榮鄭僕亡齊而歸魯齊有九合之名而魯有乾時之恥夫據千乘之國而信讒侮之計未有不亡者也故詩云讒入罔極交亂四國衆邪合黨以回人君邦危民亡不亦平乎

無爲第四

夫道莫大於無爲行莫大於謹敬何以言之昔虞舜治天下彈五絃之琴歌南風之詩寂若無治國之意漠若無憂民之心然天下治周公制作禮樂郊天地望山川師旅不設刑格法懸而四海之內奉供來臻越裳之君重譯來朝故無爲也有譏乃無爲也秦始皇帝設爲車裂之誅以斂姦邪築長城於戎境以備胡越征大吞小威震天下將帥橫行以服外國蒙恬

討亂於外。李斯治法於內。事逾煩。天下逾亂。法逾滋。而姦逾熾。兵馬益設。而敵人逾多。秦非不欲爲治。然失之者。乃舉措暴衆。而用刑太極故也。是以君子尚寬舒以苞身。行中和以統遠。民畏其威。而從其化。懷其德。而歸其境。美其治。而不敢違其政。民不罰。而畏罪。不賞。而歡悅。漸漸於道德。被服於中和。之所以致也。夫法令者。所以誅惡。非所以勸善。故曾閔之孝。夷齊之廉。豈畏死而爲之哉。教化之所以致也。故曰堯舜之民。可比屋而封。桀紂之民。可比屋而誅。教化使然也。故近河之地濕。近山之土燥。以類相及也。故山川出雲雨。丘阜生缺一字氣。四瀆東流。百川無不從。小者從大。少者從多。夫王者之都。南面之君。臣姓之所取法。缺二字舉措動作。不可失法。則也。昔者周襄王不能事後母。出居於鄭。而下多叛其親。秦始王驕奢靡麗。好作高臺榭廣宮室。則天下豪富制屋宅者。莫不倣之。設房闌。備廐庫。繪雕琢。刻畫之好。博玄黃。瑤瑋之色。以亂制度。齊桓公好婦人之色。妻姑姊妹。而國中多淫於骨肉。楚平王奢侈縱恣。不能制下。檢民以德。增駕百馬。而行。欲令天下人餒。財富利明。不可及。於是楚國逾奢。君臣無別。故上之化下。猶風之靡草也。王者尚武於朝。缺一字農夫繕甲於田。故君之御下。民奢侈者。則應之以儉。驕淫者。則統之以理。未有上仁而下殘。上義而下爭者也。孔子曰。移風易俗。豈家至之哉。先之於身而已矣。

## 辨惑第五

夫舉事者或爲善而不稱善。或不善而稱善者。何視之者謬。而論之者誤也。故行或合於世。或順於耳。斯乃阿上之意。從上之旨。操直而乖方。懷曲而合邪。因其剛柔之勢。爲作縱橫之術。故無忤逆之言。無不合之義者。昔哀公問於有若曰。年飢用不足。如之何。有若對曰。盍徹乎。蓋損上而歸之於下。則忤於耳而不合於意。遂逆而不用也。此所謂正其行而不苟合於世也。有若豈不知阿哀公之意爲益國之義哉。夫君子直道而行。知必屈辱而不避也。故行不敢苟合。言不爲苟容。雖無功於世。而名足稱也。雖言不用於國家。而舉措之言可法也。故殊於世俗。則身孤於士衆。夫邪曲之相衡。枉橈之相借。缺一字直故不得容其間。諂侮之相扶。讒口之相譽。無高而不可上。無深而不可往者。何以當背衆多而辭語諧合。夫衆口之毀譽。浮石沉木。群邪所抑。以直爲曲。視之不察。以白爲黑。夫曲直之異形。白黑之異色。乃天下之易見也。然自謬也。或不能分明其是非者。衆邪誤之矣。至如秦二世之時。趙高駕鹿而從行。王曰。丞相何爲駕鹿。高曰。馬也。王曰。丞相誤也。以鹿爲馬。高曰。陛下以臣言不然。願問群臣。臣半言鹿。半言馬。當此之時。秦王不能自信其自而從邪臣之說。夫馬鹿之異形。衆人所知也。然不能分別是非也。況於闇昧之事乎。易曰。二人同心。其義斷金。群黨合意。以傾一君。孰不移哉。昔人有與曾子同姓亦名參。有人告其母。參殺人。母織如故。有人復來告。如是者三。曾子母乃投杼踰垣而去。曾子之母非不知子不殺人也。言之者衆。夫流言之並至。雖真聖不敢自安。況凡人。

平魯定公之時。與齊侯會於夾谷。孔子行相事。兩君升壇。兩相處下而相  
欲揖。君臣之禮。濟濟備焉。齊人鼓噪而起。欲執魯公。孔子歷階而上。不盡  
一等而立。謂齊侯曰。兩君合好。以禮相率。以樂相化。臣聞嘉樂不野合。犧  
象之薦不下堂。夷狄之民何求焉。命司馬請止之。定公曰。諾。齊侯逡巡而  
避席曰。寡人之過。退而自責。大夫罷會。齊人使優旃舞於魯公之幕下。傲  
戲。欲候魯君之隙。以執定公。孔子嘆曰。君辱臣當死。使司馬行法斬焉。首  
足異河而出。於是齊人懼然而恐。君臣易操。不安其故行。乃歸魯四邑之  
侵地。終無乘魯之心。隣缺一字振動人懷。鬻魯之意。強國驕君。莫不恐懼。邪  
臣僕人。變行易慮。天下之政缺二字而折中。而定公拘於三家。陷於衆口。不  
能卒用孔子者。內無獨見之明。外惑邪臣之黨。以弱其國而亡其身。權歸  
於三家。邑士單於彊齊。夫用人若彼。失人若此。然定公不覺悟。信季孫之  
計。背貞臣之策。以獲拘弱之名。而喪丘山之功。不亦惑乎。故邪臣之蔽賢。  
猶浮雲之鄣日月也。非得神靈之化。罷雲霧翳。令歸山海。然後乃得覩其  
光明。暴天下之濡濕。照四方之晦冥。今上無明王聖主。下無貞正諸侯。誅  
鋤姦臣賊子之黨。解釋疑繙紕繆之結。然後忠良方直之人。則得容於世。  
而施於政。故孔子遭君暗臣亂。衆邪在位。政道隔於王家。仁義閉於公門。  
故作公陵之歌。傷無權力於世。大化絕而不通。道德施而不用。故曰無如  
之何者。吾未如之何也已矣。夫言道因權而立。德因勢而行。不在其位者。  
則無以齊其政。不操其柄者。則無以制其剛。詩云。有斧有柯。言何以治之也。

## 慎微第六

夫建大功於天下者。必先脩於閨門之內。垂大名於萬世者。必先行之於纖微之事。是以伊尹負鼎。屈於有莘之野。修達德於草廬之下。躬執農夫之作。意懷帝王之道。身在衡門之裏。志圖人極之表。故釋負鼎之志。爲天子之佐。剋夏立商。誅逆征暴。除天下之患。辟殘賊之類。然後海內治。百姓寧。曾子孝於父母。昏定晨省。調寒溫。適輕重。勉之於糜粥之間。行之於衽席之上。而德美重於後世。此二者。修之於內。著之於外。行之於小。顯之於大。顏回一簞食。一瓢飲。在陋巷之中。人不堪其憂。再拜者。則回也不改其樂。禮以行之。遜以出之。夫力學而誦詩書。凡人所能爲也。若欲移江河。動太山。故人力所不能也。如調心在己。背惡向善。不貪於財。不苟於利。分財取寬。服事取勞。此天下易知之道。易行之事也。豈有難哉。若造父之御馬。羿之用弩。則所謂難也。君以不以其難爲之也。故不知以爲善也。絕氣力。尚德也。夫目不能別黑白。耳不能別清濁。口不能言善惡。則所謂不能也。故設道者。易見曉。所以通凡人之心。而達不能之行。道者。人之所行也。夫大道履之。而行則無不能。故謂之道。孔子曰。道之不行也。言人不能行之。故謂顏淵曰。用之則行。舍之則藏。唯我與爾有是夫。言顏淵道施於世。而莫之用。猶人不能懷仁行義。分別纖微。忖度天地。乃苦身勞形。入深山求神仙。弃二親捐骨肉。絕五谷廢詩書。背天地之寶。求不死之道。非所以通

世防非者也。若湯武之君。伊呂之臣。因天時而行罰。順陰陽而運動。上瞻天文。下察人心。以寡服衆。以弱制強。革車三百。甲卒三千。征敵破衆。以報大讐。討逆亂之君。絕煩濁之原。天下和平。家給人足。疋夫行仁。商賈行信。齊天地。致鬼神。河出圖。洛出書。因是之道。寄之天地之間。豈非古之所謂得道者哉。夫播布革。亂毛髮。登高山。食木實。視之無優游之容。聽之無仁義之辭。忽忽若狂痴。推之不往。引之不來。當世不蒙其功。後代不見其才。君傾而不扶。國危而不持。寂寞而無隣。寥廓而獨寐。可謂避世。非謂懷道者也。故殺身以避難。則非計也。懷道而避世。則不忠也。是以君子居亂世。則合道德。採微善。絕纖惡。脩父子之禮。以及君臣之序。乃天地之通道。聖人之所不失也。故隱之。則爲道。布之。則爲文。詩在心爲志。出口爲辭。矯以雅僻。祗礪鈍才。雕琢文邪。抑定狐疑。通塞理順。分別然否。而情得以利而性得以治。綿綿漠漠。以道制之。察之無兆。遁之恢恢。不見其行。不覩其仁。湛然未悟。久之乃殊。論思天地。動應樞機。俯仰進退。與道缺二字藏之於身。優游待時。故道無廢而不興。器無毀而不治。孔子曰。有至德要道。以順天下。言德行而其下順之矣。

## 資質第七

質美者以通爲貴。才良者以顯爲能。何以言之。夫楩楠豫章。天下之名木。生於深山之中。產於溪谷之傍。立則爲太山衆木之宗。仆則爲萬世之用。